



SLUŽBA ZA REVIZIJU FINANSIJSKOG POSLOVANJA

Na osnovu člana 14. stav (1) Zakona o finansiranju političkih stranaka („Službeni glasnik BiH“ broj 22/00 i 102/09), člana 24. Pravilnika o godišnjim finansijskim izvještajima političkih stranaka („Službeni glasnik BiH“ broj 61/06), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2008. GODINU I POSTIZBORNOG FINANSIJSKOG IZVJEŠTAJA – LOKALNI IZBORI 2008. GODINE **HRVATSKE DEMOKRATSKE ZAJEDNICE 1990**

Broj: 03-07-6-18/09
Sarajevo, 23.04.2010. godine

SADRŽAJ:

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS REVIZIJE.....	5
3.1. Predmet revizije.....	5
3.2. Cilj revizije.....	5
3.3. Obim revizije.....	5
4. PRETHODNE KONTROLE I REVIZIJE.....	5
5. NALAZI REVIZIJE I PREPORUKE.....	5
5.1. NALAZI.....	5
5.2. PREPORUKE.....	6

MIŠLJENJE REVIZORA

Služba za reviziju finansijskog poslovanja u Centralnoj izbornoj komisiji Bosne i Hercegovine (u daljem tekstu: Služba za reviziju) je izvršila reviziju finansijskih izvještaja **Hrvatske demokratske zajednice 1990** i to: godišnjeg finansijskog izvještaja za 2008. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora održanih u oktobru 2008. godine.

Rukovodstvo stranke je odgovorno za finansijske izvještaje, postupanje u skladu sa zakonima i propisima i uspostavljanje efikasnog sistema internih kontrola.
Naša odgovornost je da izrazimo mišljenje na osnovu revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa Zakonom o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskom izvještaju, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom smo utvrdili da Hrvatska demokratska zajednica 1990 u izvještajnom periodu nije postupila u skladu sa odredbama člana 8. stav (1) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaji ukazuju da je Hrvatska demokratska zajednica 1990 u 2008. godini postupala u skladu sa Zakonom o finansiranju političkih stranaka.

1. UVOD

Služba za reviziju finansijskog poslovanja u Centralnoj izbornoj komisiji BiH (u daljem tekstu: Služba za reviziju) je izvršila reviziju godišnjeg finansijskog izvještaja **Hrvatske demokratske zajednice 1990** za 2008. godinu i to: godišnjeg finansijskog izvještaja za 2008. godinu i finansijskog izvještaja za period od dana podnošenja prijave za ovjeru za izbore do dana ovjere rezultata lokalnih izbora održanih u oktobru 2008. godine.

Revizija je preduzeta u skladu sa članom 14. stav 1. Zakona o finansiranju političkih stranaka i članom 24. Pravilnika o godišnjim finansijskim izvještajima političkih stranaka („Službeni glasnik BiH“ broj 61/06) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08).

Zbog činjenice da se revizija obavlja na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Hrvatska demokratska zajednica 1990 je iskazala prihode u iznosu od 756.466,05 KM, čija struktura je data u sljedećoj tabeli:

Red. br.	Vrsta prihoda	Iznos u KM	Učešće u uk.prih. %
1	Članarina	10.786,15	1,42%
2	Prilozi fizičkih lica	86.422,30	11,42%
3	Prilozi pravnih lica	72.670,00	9,61%
4	Prihodi od imovine	0,00	0,00%
5	Prihodi od pr.lica	0,00	0,00%
6	Prihodi od poklona	500,00	0,07%
7	Prihodi iz budžeta	585.488,91	77,40%
8	Ostali prihodi	598,69	0,08%
	Ukupni prihodi:	756.466,05	100,00%

U godišnjem finansijskom izvještaju Hrvatska demokratska zajednica 1990 je iskazala ukupne rashode u iznosu od 753.894,96 KM.

2. PREDSTAVLJANJE POLITIČKE STRANKE

Naziv političke stranke: Hrvatska demokratska zajednica 1990. Skraćeni naziv stranke je HDZ 1990. HDZ 1990 je registrovana 13.04.2006. godine u Kantonalnom sudu Mostar pod rednim brojem 007-0-R-06-000031.

Sjedište političke stranke je u Mostaru, ulica Nikole Šubića Zrinjskog 12/II.

Lice ovlašteno za zastupanje stranke je Božo Ljubić, predsjednik.

Lice ovlašteno za podnošenje finansijskih izvještaja za 2008. godinu je Ivica Drmać.

Prema podacima iz godišnjeg finansijskog izvještaja za 2008. godinu, organizacionu strukturu Hrvatske demokratske zajednice 1990 čine:

- Središnjica HDZ 1990,

- 6 kantonalnih odbora,
- 28 općinskih i 2 gradska odbora i
- HDZ 1990 Brčko –Distrikt BiH.

3. OPIS REVIZIJE

Predmet revizije je godišnji finansijski izvještaj Hrvatske demokratske zajednice 1990 za 2008. godinu i finansijski izvještaj za period od dana podnošenja prijave za ovjeru za izbore do dana ovjere rezultata lokalnih izbora održanih u oktobru 2008. godine i to sljedećih organizacionih dijelova:

1. Središnjica HDZ 1990,
2. Gradski odbor HDZ 1990 Mostar i
3. Kantonalni odbor HDZ 1990 Središnja Bosna Travnik.

Cilj revizije je da se prikupi dovoljno relevantnih dokaza kako bi se moglo izraziti mišljenje o tome da li je HDZ 1990 u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10. Izbornog zakona BiH.

Obim revizije finansijskog izvještaja Hrvatske demokratske zajednice 1990 obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih i pravnih lica, prihode iz budžeta i troškove predizborne kampanje.

4. PRETHODNE KONTROLE I REVIZIJE

U prethodnom periodu izvršena je revizija godišnjeg finansijskog izvještaja Hrvatske demokratske zajednice 1990 za 2006. godinu i postizbornog finansijskog izvještaja-opšti izbori 2006. godine. Izdat je izvještaj o reviziji sa mišljenjem, nalazima i preporukama revizije da je stranka postupala suprotno odredbama člana 4. stav (2) i člana 11. stav (3) Zakona o finansiranju političkih stranaka. Takođe, izvršen je pregled godišnjeg finansijskog izvještaja za 2007. godinu i izdat je izvještaj o pregledu sa nalazima revizije da stranka nije imala nedostataka u finansijskom izvještaju i mišljenjem revizije da se finansirala u skladu sa Zakonom o finansiranju političkih stranaka.

5. NALAZI REVIZIJE I PREPORUKE

5.1. NALAZI

Na osnovu obavljene revizije godišnjeg finansijskog izvještaja utvrđeno je da HDZ 1990 nije postupila u skladu sa odredbama člana 8. stav (1) Zakona o finansiranju političkih stranaka.¹

Općinski odbor HDZ 1990 Zenica koristi kancelarije Hrvatskog doma „Kralj Tomislav“ bez naknade², koje su u vlasništvu Hrvatskog društva „Napredak“ Zenica. Na taj način stranka je ostvarila zabranjeni prilog i postupila suprotno odredbama člana 8. stav (1) Zakona o finansiranju političkih stranaka.

¹ Državni, entitetski i kantonalni organi, organi opštinskih i mjesnih zajednica, javne institucije, javna preduzeća, humanitarne organizacije, preduzeća koja su po svojoj djelatnosti isključivo neprofitna, vjerske zajednice, kao i privredna udruženja u kojima uloženi javni kapital iznosi najmanje 25% ne mogu da finansiraju političke stranke.

² Izjava predsjednika OO HDZ 1990 Zenica.

Troškovi predizborne kampanje

Hrvatska demokratska zajednica 1990 je postupila u skladu sa odredbama člana 15.10 Izbornog zakona BiH, odnosno u svrhu izborne kampanje je potrošila 288.724,88 KM.

Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM³ po biraču u svakom izbornom krugu, prema broju birača koje je objavila Centralna izborna komisija BiH.

Prema podacima Centralne izborne komisije BiH, Hrvatska demokratska zajednica 1990 je u svrhu izborne kampanje za Lokalne izbore 2008. godine mogla potrošiti 447.427,55 KM.

5.2. PREPORUKE

Preporučuje se Hrvatskoj demokratskoj zajednici 1990 da se pridržava odredbi Zakona o finansiranju političkih stranaka, a posebno na osnovu uočenih nedostataka se preporučuje:

- ***da postupa u skladu sa odredbama člana 8. stav (1) Zakona o finansiranju političkih stranaka i to :***

- da ne prima zabranjene priloge,

KOMENTAR

Hrvatska demokratska zajednica 1990 se aktom od 26.03.2010. godine očitovala na Preliminarni izvještaj o reviziji godišnjeg finansijskog izvještaja za 2008. godinu i postizbornog finansijskog izvještaja – Lokalni izbori 2008. godine, te uz očitovanje dostavila dopunu finansijskog izvještaja u kome je otklonila nedostatke, vezane za priloge fizičkih lica po osnovu davanja poslovnih prostora bez naknade u smislu nalaza iz člana 6. Zakona o finansiranju političkih stranaka. Takođe HDZ 1990 je dostavila pravilno popunjene obrasce nenovčanih donacija, te je na taj način otklonila nedostake vezane za član 11. stav (3) Zakona o finansiranju političkih stranaka. Dopunu izvještaja Služba za reviziju je uvažila i ugradila u konačan izvještaj o reviziji. Primjedbu koja se odnosi na član 8. stav (1) Zakona Služba za reviziju finansijskog poslovanja nije mogla uvažiti, i u tom pogledu nalaz je ostao nepromjenjen.

Zahvaljujemo se osoblju Hrvatske demokratske zajednice 1990 i osobi ovlaštenoj za podnošenje finansijskih izvještaja na dobroj i korektnoj saradnji tokom obavljanja revizije finansijskih izvještaja.

Mr. Hasida Gušić, šef Službe za reviziju

Nevenko Andan, revizor

Anela Burdžović- Kapić , pomoćnik revizora

³ Član 15.10 stav 2. istog člana propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.